

CUMÜN DA SENT



# Il mas-chalch da Sent

Publicaziuns officialas. Cumpara segund bsögn.  
2012-2014  
no. 19

7554 Sent, 17 gün 2013

## Radunanza cumünala

La radunanza ais gnüda fixada sün **gövgia, als 04 lügl 2013, a las 20.15**, in chasa cumünala.

### Tractandas:

1. Salüd dal Capo
2. Protocol da la radunanza cumünala dals 15 avrigl 2013
3. Rendaquint cumünal 2012  
(quint da gestiun, quint d'investiziun e bilantsch;  
rendaquent da l'amegliaziun generala)
4. Rapport da la cumischiun sindicatoria
5. Realisaziun d'üna zona da quietezza pella sulvaschina / Piz Valgronda
6. Revisiun da la planisaziun cumünala / orientaziun
7. Varia

*Il rendaquent cumünal po gnir retrat pro l'administraziun cumünala a partir dals 25 gün 2013.  
A partir dals 17 gün 2013 po gnir tut invista illa documainta a regard la zona da quietezza.*

## Il Cussagl cumünal

### Votumaziuns

#### infuormaziun a regard votumaziun a l'urna

Tschertüns agirs a chaschun da las votumaziuns precedentas han demuossà, chi regna malsgürezza resp. incugnuschtscha pro la votumaziun a l'urna.

Seguond prescripziuns e ledsch'actuala ha mincha votanta e votant l'ocasiun da vuschar in scrit, voul dir cha d'ürant 3 eivnas po el trametter per posta obain lura surdar sia busta cul cuntgnü a l'administraziun cumünala.

Ultra da quai ais datta la pussibilità la dumengia, d'ürant las 09.30h fin a las 10.30h da consultar l'urna, chi'd ais plazzada in chasa cumünala. Per evitar malinclettas ed ün agir, chi nu's cunfà cullas prescripziuns da la ledscha, valan pro las votumaziuns, la dumengia a l'urna, seguaintas prescripziuns.

- ***Id ais be pussibel da vuschar là persunalmaing. La persuna sto esser preschainta ed ella nu das-cha gnir rimplazzada d'üna terza persuna resp. confamigliar.***
- ***I nu das-chan là gnir missas ingünas bustas serradas ill'urna, las cedlas da votumaziun han da gnir büttadas libramaing ill'urna. Ils cusgliers cumünals, chi survaglian l'urna, sun obliats da far quella controlla e da refusar bustas da terzas persunas (quellas han da gnir missas illa chartera).  
Plünavant sun els obliats da pretender la carta da votumaziun e da drivir resp. da pretender, cha la votanta o votant driva sia busta e lascha buollar las cedlas da votumaziun. Natüralmaing ha quai da succeder in möd discret, uschè chi saja garantida l'anonimità da la votanta e votant.  
La carta da votumaziun sto, pro la votumaziun a l'urna, eir gnir datta giò, quella nu sto però urgiantamaing esser suottascritta. Pro la votumaziun in scrit ais quai però ün dovair.***

Nus giavüschain da tour cogniziun e d'agir in möd sco survart circumscrit.

**Il Cussagl cumünal e l'administraziun**

## **Deposits da veiculs ed utensils sün territori cumünal**

Ultimamaing ha il Cussagl cumünal decis d'introdüer üna taxa resp. fit e da pretender chi gnïa inoltrà üna dumonda per pudair depositar veiculs ed utensils sül areal in Sot Crusch. Uschè ha el decis da fixar üna tax'annuala pro veicul ed utensil deposità.

Quatras rend'ìl Cussagl attent, chi'd ais proibi da depositar veiculs ed utensils sün terrain cumünal. Quai das-cha be succeder in basa d'üna dumonda e d'üna decisiun davart dal Cussagl, chi destinescha eir il lö.

A medem temp rend'ìl Cussagl quatras attent a tuots garaschists, cha veiculs depositats pro lur garaschas, chi nu vegnan plü dovrats e tuts in vigur, han da gnir allontanats, seguond las üsitadas prescripziuns da la ledscha. Scha quai nu vegn observà tir'ìl Cussagl in consideraziun da punir da quels surpassamaints.

**Il Cussagl cumünal**

## **WAVE – la plü lunga cuorsa da veiculs electricis riva a Sent**


Ils **2 da lügl** riva la cuorsa da veiculs electricis "WAVE" a Sent. Sül traget da 1800 km tras las Alps sferman tanter las 13.00 e las 20.00 veiculs electricis sün Plaz a Sent.

Il böt principal da la cuorsa nun es il temp ed il rang, dimpersè da lantschar ün'uonda (inglais: wave) per sensibilisar la glieud pella tematica d'energia. Sco cità d'energia lessan nus nüzziar quist'ocasiun per infuormar la populaziun d'urant la davomezdi e saira dals 2 lügl sün Plaz.

D'urant cha'ls 40 veiculs rivan a Sent e fan là üna posa da ca. ün'ura as poja admirar ils autos e s'infuormar sur da tecnologia d'energia electrica.

A parti da las 13.00 esa organisà ustaria e musica, posts d'infuormaziun ed i's po prouvar oura velos electricis (E-Bikes).

Nus invidain a tuot la populaziun e giasts da gnir a verer quist veiculs e da star da cumpagnia.



**Il Cussagl cumünal**  
**La cumischiun d'energia**

## **Traversada 2013**

**La traversada 2013 vain realisada**

**in sonda, als 6 lügl 2013**

**I vegnan resguardadas las annunzchas tenor lur entrada.**  
**Nus ans allegrain da gronda partecipaziun**

**Ils organisateurs**

## **Giantar cumünaivel**

Nos giantar da cumünanza mangiaina aint il Hotel Sinestra als 20 gün 2013. Nus ans chattain aint in Plaz ca. a las 11.30h. Il viadi ais organisà. Chi chi vuol ir a pé dess per plaschair annunzchar ad Erica Clalüna, tel. 081 864 07 59.

Nus sperain sün buna cumpagnia  
**Corporaziun evangelica**

## **Plazza da sport “Palüzot”: Ballapé per creschüts**

Mincha venderdi ans chattaina a partir da las 20.00 illa plazza da sport Palüzot per giovar a ballapé. Tuot ils creschüts sun fich bainvis. Nus ans allegrain da pudair giovar bels gös da ballapé sün nossa plazza da sport.

**Ils trenaders da ballapé dals  
scolars**

## ***Da dar a fit a Sent***

**üna plazza da parcar in üna garascha suotterrana  
a Costa dad Archas C**

Annunzchas pigl'incunter

*Lauber Barbüda Fiduziari, Scuol  
081 862 28 91*

**Lauber Barbüda Fiduziari**

**Il Cussagl e l'administraziun giavüschan a tuot nossa populaziun üna bella e choda stà  
cun bler sulai e cun fich pitschen adöver dal parasur.**

**A tuot quels chi van, giavüschaina bellas e recreativas vacanzas.**

